

# «La metta da fein» a Vrin

Radiotelevision Rumantscha producescha in'emprima seria da web ficziunala

■ (rtr/fmr) RadioTelevision Ruman-tscha producescha sin la fin 2020 l'emprima seria-web ficziunala rumantscha dals auturs Carlo Beer ed Urs Berlinger. L'istorgia è in crimi umoristic e vegn filmà, tut tenor situaziun dal coronavirus, durant quatter emnas il fanadur/avust a Vrin en la Val Lumnezia. Noss public en mira è creschì si cun il web e consumescha oz streams da Netflix, Disney+, Spotify & co. RTR è cun l'emprima seria ficziunala rumantscha al puls dal temp ed al puls da noss auditurs. La seria pon ins guardar sin rtr.ch, pia sin il player «RTR play». Medemamein vegn ella publitgada sin las raits socialas sco Facebook, Instagram e YouTube.

La SRG sviluppescha actualmain en pli ina plattafurma da stream per l'entira interpresa, nua ch'i vegn ad esser pussaivel da consumar cuntegns cun sottitels er da las autras unitads sco RSI, RTS, SWI, SRF e sa chapescha er dad RTR. Er la «Metta da fein» vegn publitgada sin questa plattafurma ed è uschia accessibla e chapavla cun sottitels en l'entira Svizra.

## Synopsis

En in vitget en la Surselva vegnan regularmain chattads animals cun chommas tagliadas giu. La pitschna cuminanza è tementada. Entant che plirs abitants crain vi d'in mitus emprova il policist da sclerir il cas, quai però senza success. Ils



Urs Berlinger e Carlo Beer (da san.) durant chattar in bun lieu per filmar.

MAD

mazzaments s'augmentan sco er la disfidanza dals abitants dal vitg. La seria da mazzaments finescha cun ina catastrofa a la festa dal vitg.

Ils dus auturs e students da film Carlo Beer da Sedrun ed Urs Berlinger da la Sursilvania tematiseschan en lur istorgia il mitus da la «Metta da fein» ch'ins enconuscha anc oz, en spezial en Surselva. Questa figura vegn per exempel descritta en la Crestomazia sco suonda: «La metta da fein ei ina femna veglia, nera e macorta, che se zuppa el fein. Als affons, che van el fein, taglia ella giu las combas cun sia faultsch...». Participada al project è er la firma da produzioni «Filmgerberei GmbH». Quest team planisescha e producescha la seria dal casting fin al tagl final.

## Carlo Beer

Carlo Beer (\*1985) è creschi si a Sedrun. Suentar l'emprendissadi da cuschinier ha el passentà tschintg onns a Los Angeles. Durant quel temp ha el cumenzà a scriver ed a s'interessar per il film. Suentar che Carlo Beer è turnà en Svizra ha el fatg la matura ed ha lavurà en differentas professiuns. Da 2015 fin 2020 ha el studegià reschissur e librettist da film a la Scola auta d'art (ZHdK) e realisà plirs films curts. Carlo abitescha a Turitg.